

НҰРЛЫ ОТАНЫМЫЗ - ТӘУЕЛСІЗ ҚАЗАҚСТАН

Тәуелсіздік – мына әлемнің бір іргесіне кірпіш болып қаланған қазақ деген халықтың көпті көрген мандайына бақ, құт болып орнады. Дегенмен, біз осы ел тарихын жеткілікті деңгейде білеміз бе? Өскелең ұрпаққа оның мәнін, тереңдігін, құндылығын, бағасын ұғындырып, түсіндіру қолымыздан келер ме екен?

Азат болу, бостандыққа бас ұру – қайран қазағымызға ежелден арман еді. Кезінде жер бүтіндігін мұрат етіп, жаудушпанға дес бермеген Исатай мен Махамбет, Қабанбай мен Бөгенбай сынды батырларымыздың қаны дарыған Қайрат Рысқұлбеков, Сабира Мұхамеджанова, Ербол Сыпатаев, Ләззәт Асанова секілді намыс үшін бас тіккен ұландарымыз өткен ғасырдың тәуелсіздік үшін күрес жолында қазағымыздың ұл-қыздары қашан да ержүрек, батыл, сынбас сақтың иегерлері екенін дәлелдеп өткендей. «Ер жігіт ел үшін туады, ел үшін өледі» деген мақал жолдарын естісем, бірден осы аға-өпкелерімді еске ала қоямын. Расында да, ел басына күн туғанда жалғыз шыбын жандарын ку шүберекке түйіп, ұланбайтақ даламыздың әрбір миллиметрі үшін қорқыныш,

жасқану деген сезімдерді жүректерінен суырып алып тастады. Сол бір кездегі желтоқсан ызғары қазіргі Тәуелсіздігіміздің лебін әкелгендей...

Жалпы, мен – Тәуелсіз Қазақстанымыздың жас буынымын. Жас та болсам, ата баба, бергін келе аға-өпкелеріміздің тәуелсіздікке, бейбіт күнге батыл, жігерлі басқан әрбір қадамдарының ащы дәмін тілім сезіп тұрғандай... Кей кездері ойыма ұшқары ерік бере қойсам, «Батырлар дүрілдеп өткен жер, Тұлпарлар дүбірлеп төккен тер» деп жырлаған ақиық ақын Мұқағалидың сөздері бірден есімді еріксіз бойлай кетеді. Шынында да, біз жүрген орта, тау-тас, өзен-аңғар мыңжылдық тарихтың бұлтартпас куәгерлері екені қай-қайсымызға болса да хақ. Тәуелсіздік тарихын бұлардан аса ешкім білмейді-ау, сірә. Қайран қазағым, ашаршылықты да, небір зұлмат соғыс кезеңдерін де, тұла-бойы тарихынан, тілінен көз жазып қалуды да, бөрі-бөрінен бастан өткеріп, ең төмамында арман болған тәуелсіздікке қол жет-

кізіп тынды. Осындай жетістігімізді тіпті әлемнің түкпір-түкпіріндегі халықтар, солардың ішінде ең алғаш болып Түркия мемлекеті ресми түрде жылы мойындады. Осылайша әлемдік сахнаға Қазақстан деген мемлекет нық қадам басты. «Бірлігі жоғары елді жау алмайды» деген қазақ шіркіннің асыл сөздері еш бекер айтылмамаған. Толассыз қанмен, ащы термен келген тәуелсіздігімізді сақтап қалмасaq, еліміздің болашағынан зор үміт күттіретін біздей ұрпаққа орны толмас, үлкен сын болмақ.

Құдайға мың да бір шүкір, мемлекетіміз бүгінгі күні тек қуантарлық жаңалықтарымен, білімді ұрпақтарымен, ең бастысы – бірлік-бейбітшілігімен өсіп, өніп, өркендеп, талай мемлекеттің алды болып, шаң қақтырмай келеді. Жеткен жетістіктеріміздің ең көрнектісі – төрт құбыламызды тегістеп, шекарамызды белгілеп және өзіміздің меншікті Қарулы Күштерімізді жасақтауымыз, еліміздің елдігін белгілейтін ұлттық белгілеріміз,

қайта оралған тіліміз, дініміз, салт-дәстүріміз.

Мемлекет басшысы Қасым-Жомарт Кемелұлы Тоқаев жанда болып жатқан індетке байланысты туындап жатқан қиындықтарға қарамастан, ел тізгінін берік ұстап, жақсы көш бастап келе жатқанын мақтанышпен алға тартқым келеді.

Қорытынды сөзімді түйіндей келе, Тәуелсіздік – тарихы мұрада, таңбасы таста, қаны қара жердің тамырында жатқан киелі ұғым дегім келеді. Ол – барша қазаққа ортақ ұлы жеңіс, мәртебе. Тарихсыз, өткенсіз болашақ жоқ, онсыз өмір сүру тіптен мәнсіз. Осыны әрбір қазақ баласы ұқса, сезінсе деймін. Сонда ғана қазақ хандығынан бастап, бергісі егеменді елдің бүгінгіне дейін көшті жалғастырып келе жатқан – жас ұрпақ, ешқашан да осы күнге қандай алып арландардың арқасында жеткенімізді ұмытпайды!

Меруерт ДҮЙСЕНАЛЫ,

*М.Әуезов атындағы
ОҚУ-ның Заң факультетінің
1-курс студенті,*

А.АЛЫПУРАЗОВА,

*жетекшісі, аға оқытушы,
құқық магистрі.*